

■ COLUMNA

Ina «sacra glünina»

DAD AITA DERMONT-STUPAN*

En quest temp dad agendas vidas capita propi ch'jau m'occup gia duas emnas ordavant cun la columna ch'jau hai da scriver per ils 4 da matg. Quai ch'uschiglio, cur ch'il termin è qua, stoss jau chattar sut squitsch in tema per scriver. Questa giada ma poss jau prender peda.

Però jau less natiralmain scriver ina columna actuala, e sas ti tge ch'i capita anc en duas emnas! Tge saraja ils 4 da matg?

Mi'egliada resta fitgada sin il chalender (ladin) che stat anc sin maisa. Tschel di l'avev jau prendì per mauns per guardar cura ch'i fiss ina buna ensaina per metter tartuffels.

Jau enconusch ina persuna che drizza tut sias lavurs tenor il chalender lunar. La saira dat ella in'egliada en il chalender e sa tge ch'ella ha da far l'auter di. Tut respect da questa moda da viver, er sche per mai na fiss quella propi adattada. Jau vess adina insatge auter che vegniss a travers.

Ma guardain pia tge ch'il calendari di. Il citat a la pagina iniciala: «avoir üna sacra glünina».



Tge vuls dapli! Ils 4 da matg, glindesdi, Flurin (protestant), Monica (catolica), ensaina settentriunala giuvintschella, glina creschenta, levada dal sulegl a las 06.02, tramunt dal sulegl a las 20.33, dura dal di 14 uras e 49 min. Tenor il chalender lunar empermetta quel di success cun emplantar bostga u chagliom u transplantar plantas. Ed igl è in di ideal per tagliar ils chavels.

So, tge fatsch jau ussa cun questas datas? Gea, jau poss levar a las 06.00 e guardar sch'il sulegl sa musa, e la saira vi jau guardar ses tramunt. Tar la coiffusa poss jau dumandar in termin. Ma per descriver quests eveniments en la columna dals 4 sun jau lura memia tard. Ed emplantar bostga? Jau na possed nagin terren. Unicamain quels dus meters quadrat sisum il parcadi nua ch'jau hai endrizza in pitschen cumpost, e dasperas, en la terra guadagnada, hai jau mess l'onn

passà in pèr flurs ed in pèr spezarias.

Per mia columna na ma gida pari il chalender lunar betg grond toc. La schain pia passar anc in pèr dis. Forsa ma vegna endament insatge...

Eguarda! Oz ch'jau vi bittar in pèr paletschas sin il cumpost ves jau che la flur-sulegl da l'on passà ha bittà sem. Plain flurs-sulegl pruijan sper il cumpost, almain var 30! Ussa sai jau tge far ils 4 da matg.

Jau vom tar l'ortulan per pitschens recipients cumpostabels ed emplant en mintgin d'els ina flur-sulegl. Lura met jau las trenta plantinas davant porta chasa en retscha. (L'entrada da mia chasa è situada directamain sper via.) Jau ma tschent sin la pedra da batter e spetg a passar la gliעד. A mintga passanta e passant di jau:

Allegra. Prenda cun tai ina flur sulegl, emplantada oz, sin ina buna ensaina tenor il chalender lunar. Ella duai derasar buna luna, ina sacra glünina.

* Aita Dermont-Stupan da Sent è stada u è anc adina magistra, pastra, translatura, redactura, mamma e tatta – e columnista. La columna da la «Convivenza» che cumpara normalmain en questa plazza il glindesdi, cumpara en la gasetta da damaun.